

四庫全書

集部

欽定四庫全書

集部

清容居士集卷一

一至三

詳校官庶吉士臣張溥

侍讀臣孫球覆勘

總校官降調編修臣倉聖脉

校對官編修臣勵守謙

謄錄監生臣蔣繼勳

欽定四庫全書

集部五

清客居士集

別集類四元

提要

臣等謹案清客居士集五十卷元袁桷撰桷有延祐四明志已著錄其集據蘇天爵行狀及元史本傳俱稱五十卷此本卷數相符蓋猶舊本也桷少從戴表元王應麟舒岳祥諸遺老遊學問淵源具有所自其在朝踐歷清

華再入集賢八登翰苑凡朝廷制冊勛臣碑版多出其手故其文章博碩閎麗有盛世之音尤練習掌故長於考據集中如南郊十議明堂郊天異制議祭天無間歲議郊不當立從祀議郊非辛日議諸篇皆成宗初所上其援引經訓原原本本非空談聚訟者所能當時以其精博並採用之其詩格俊邁高華造語亦多工鍊卓然能自成一家蓋楠本舊家

文獻之遺又當大德延祐間為元治極盛之際故其著作宏富氣象光昌蔚為承平雅頌之聲文采風流遂為虞楊范揭等先路之導其承前啓後稱一代文章之鉅公良無愧色矣乾隆四十六年十一月恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

清容居士集卷一

元 袁桷 撰

賦

導游賦

陳郡袁桷家於甬之隅足不踰閩而四方交游往復  
之義亦能舉其槩聞吳興子昂趙子清名雅言為作  
導游賦道予所蘊亦以見夫思其人而不可見之意

詞曰

嘗悲乎好游之士閱終歲而莫聞非秉志而媚私亦飾  
行以矯羣方其命車於王良假驂於造父過屠繒之沛  
弔絃歌之魯許身結志慷慨偃僂抗銅盤以矢辭握幽  
蘭而結賦炫華堂之冰雪眇修途之霜露蓋將修斷金  
之利雖閭牆而莫我敢侮息肩於門晞髮於廬不一歲  
月迨見夫蠅聲而歌倚楹而吁雖千里之異殊何老壯  
之卒逾也世有索居肥遯壑門塞竇尊委俚之聞友汗



青之朽是猶談智於尺寸測日於戶牖猛虎嚙嚼幽獠  
悲啾獨行無儔謹揉其輶槩彼一士與時偕藏具大塊  
之清淑服忠厚以自昌余將往而未得倚吳山以相望  
振衣中庭萬籟寂玄頎形廣顙眇兮翩翩墜余以言曰  
懷辛之椒人或議其妖充梁之木人或惡其獨夫既自  
以為直而亦豈不以為曲阮生自持幾於目語削木已  
漫假手於祖匪達人之曠羈終察察乎廉隅余蹶然而  
笑喟然而思拂龜以占莫測其疑抑搔首而歎戲故髻

鬚以致期遂申之以辭連城之壁佩以容兮環龍之劍  
喜其鋒兮伊若人兮物不可同兮我欲從兮樂有終兮  
江山兮複長方舟兮可航辭未竟童子擁篲而前曰豈  
所謂千載之人耶吾當從子而西矣

雲林賦

若知雲乎昭昭然服光以廣微隆然廓然又似夫五色  
萬物而沉幾來弗以趾去弗以馳其始也盤辟夾輔輪  
輪圉圉孰合其處所其終也寸芒以興導轟轟啟鈴鈴

汨沮洳襄丘陵若慕而佇若泣而赴愀兮哀不知所訴  
蜺蜺眇綿含英吐鮮適傾蓋而忘返衆接席以爭先誠  
果樂乎莫與之宣形成乎無形名生於有名囿於家林  
允為儀刑奉著占之曰居高而卑佩矩帶規升於木無  
往不復不泄不辱言歸其谷伊南維湖將以為居齋三  
日祝而蒞諸蒼兮中峰式瞻其端為章為祥為輪為冠  
風以潤之雨以需之挾陰而噓乘陽而舒朝飛夕躋莫  
窮其棲有翼者鵠遵於其涯曰將有行自東徂西綏而

迎之維壙之崇施而流之維泉之通以沐以容是謂雲  
林之宮

玄雲石賦

泗流迴淵禹朝步兮秉陰發奇靈鼈負兮玉質墨章浮  
帝都兮廉辨以清協磬濩兮堅剛洞虛積元感兮磅礴  
太素屹空嵌兮靜居泊如日儀以湛兮虛一闡圖握九  
讚兮八方宣明二儀竅兮抱形介貞合窈眇兮綢綢縕  
縕道之奧兮肇稱玄雲吾將以觀衆妙兮

淳賦

粵若邃古仁風熙熙擊壤灌陰以佚以嬉巷無夭瘵物  
無癘疵祥麟應囿靈龜負池樂以導和禮以黜衰齷齪  
其春渾渾其天守冲若虛不夸不鑄佩矩帶規養於深  
淵擬諸樸兮文理具宣擬諸象兮充然混完見不以迹  
視不以形斟酌太和胚胎粹精居之莫疑神維壹清若  
有若亡訖莫可名二儀絪縕肇分化醇人行乎中孰全  
其真注茲玄酒淡兮在尊御史氏尹敏學潛珍服習典

謨葆厥靈根齋居靜儀人莫可聞攷諸庖羲其名曰淳

玉龜杖賦

有璞於此純綸氤氲瑤光之精為靈為文謹櫝以藏不  
泄孔溫穹窿中乾夷靜合坤淵淵其容深深其神爰有  
善木含章揚芬飾端以儀往來無垠鬱我壽宮有祭者  
雲維季翼翼聿懷彼瀆跪而祝諸以奉番君曰履道坦  
而元吉者歟任重而不希其力者歟視下而無危嬉戲  
如兒審時而行得艮以防抑心自強底夫康莊其形不

孤其智若圓化而神之曷知其遷以相以持是謂期頤

桐柏觀賦

孫興公天台賦運意高簡忘象以求斯得之凝和虛  
君居是山以桐柏觀圖授余曰子為我續繹其景不  
揆瓦石援筆為之賦曰

厚坤載德台山効靈蜿蜒扶輿天孫之精僊書易之以  
桐柏敞神界為金庭轆轤三光磅礴太空睇暘谷之倒  
景卒莫能擬諸形容也睠彼華頂羣山啟蹤倡九牧以

執玉魏冠仰其顚顚香林玉霄夾驂以從華林不彫卧  
龍從龍玉泉御右法蓮殿戎東峙翠微西蹲紫霄巧面  
勢以規輔玄局沉沉乎沈寥維妙有之珍館匪攀援之  
可求除三彭之內蕩守中戒以默脩影息於鄧林機忘  
於海鷗上池飲之以洞視金膏服之而冥搜不然者良  
不能以久留也粵昔子晉韜精帝京弄參差於緱山搏  
扶搖以遐臨瓊臺儼其龜負雙闕屹乎龍蹲正右弼以  
贊化千齡髣乎氤氲故茲山也四面削成中心如掌真



風合於冥廓梵炁通乎肸蠁三井之泉千尺之潭皐羽  
警其瀼露髯羊匿於陰嵐飛梁凝冰側足涉褰翠藤流  
霜觸纓捫緣梭溪交流以織文忽蟠螭之鉤連望飛瀑  
之懸絕日五色而成妍夫樂與餌過客所止夸誕逐魂  
踐形者恥長生之藥眇茫於神山執期之候談譎於五  
利却衰疏頑簡易理得其亦有所益乎菌蠢春秀竇鶯  
冬萌五葉之松三脊之香丹光騰於金鼎冰泉徹於銅  
罍服食之而不墜身輕忽焉以復丁企列僊之遺蹤葛

翁策名於太極斗晶熒於樞紐金光雜流於瑤席納雷  
谷之砰礚窮幽淵之罔象丹鳳昔馬以來儀凡羽殿今  
以避讓諒守貞以制氣匪狡獪以增誑法不孤立道不  
虛行繼之者白雲先生受素書於軒轅襲帝胄於典午  
澹寡言而無營思坐忘以遐舉承唐皇之明問敷清淨  
之舊章署漆書於寶幢迎黃雲於玉堂厥後憲章希夷  
範圍靈寶誦藥珠之玄文過期頤以終考若是者誠何  
異於蓬島或有言曰樓臺榮觀方士侈崇夷考是山不

綺而豐不幽而通廓兮其有容閔兮其訖逢味興公之  
抉奇訊擇木之寫真若增其嶽盜盡其竊深身不羽而  
凌遡俄曾城以瑤林迺若丹霞伏光鐵柯舒英集衆妙  
以凝睇髣三真之傳經擬金剛於鐵磨警黑業於鴻鐘  
何錢李之二王莫能悟其祿終猿抱子以望月虎伏威  
而諷風靈璫清以集鸞哀弦急而驚鴻爰自有而即無  
眇壹氣之鴻濛悼南國之蒸歎髣天都之肅冽彼夏蟲  
與火鼠徒自煎以內熱申之以辭曰

帝子下兮雲中質通明兮粹冲覽炎洲兮垢紛節容與  
兮茲峰蓬瀛杳兮無極浪滔天兮不可以履境荒滅兮  
亡益曰此留兮吾將以內息神為尻兮氣為輿朝紫霞  
兮暮清都黜視聽兮道靡渝歷千劫兮復故初雲凝素  
兮中壇鈴流露兮日暎三灾屏兮嘉祉繁語夫世人兮  
歸休乎靜觀

椿堂賦

為宜春彭有  
年道士作

昔嘗疑夫漆園之叟學幻而逃虛詢蟲魚之疏考風土

之書莫之敢圖余游上京有客北窮夫金山西歷夫賀  
蘭南踰雕題東超三韓蹶然而言芒芒禹跡子所履者  
誠然乎冬裘夏葛寒暑之運環也今也日臨中街霜飛  
冰霾毳集於踵貂挾於懷戴斗接浙承露凝枯子安視  
而靡猜駭聞忽見知奚窮乎齊諧吾先枚夫九州者而  
言之屢熟之稻南州是專十丈之蓮華峰所傳枯化石  
以錫貢樟生庭而為州梅梁分以鎮妖牂牁肇乎維舟  
杞犬吠而質變復人形以劑投華平雖常瑞於皇圖莫

英屈軼盛於堯世木沉產子以成國樹古眩精而為魁  
松分秦王之封柏擅蜀相之祠若是則復何疑焉在昔  
大帝窮源崑崙見北溟之鵬視之若雪即之如雲得其  
遺羽文尋不能以論是齊物者非寓言也耶維老彭之  
遺裔握六氣以自馴肇茲齋居其名為椿二儀絪縕周  
流無垠則以自儀道合至淳吸兮若韞旋兮若輪肅兮  
似秋熙兮如春行乎六合而不躋則所謂八千者吾猶  
以為歲年之稊米也客揖而去遂為之賦

仁壽堂賦

合江老人杜氏行年八十有二其鄉人尊之以仁壽  
因名其堂子輝卿今為蜀省掾來京師求賦賦曰

合江老人生於三卯歲之中秀眉疎明鮐背隱隆家事  
勅斷遺聞春容口欲宣而彌哽情屢發而莫逢會稽生  
揖而進曰生居東南襲輕飫甘耳不屬於鉦鼓目不接  
於戈鋌合江之事相傳於游談願削牘書槧俾鴻筆以  
有參老人改容正襟往侶可尋夢若初覺病猶在身方

其誓師斗城滅親割情盟重於白馬命輕於浮塵黃風  
颺沙千戍屏營擁若波湧排若算經危堞隳而礮激闌  
戟護而矢承臂者瞽者各有攸職熏室旁穴旦不遲夕  
壞館門毀甃石樹列對峙填負旁阮卓飛泉於雲根起  
清流之千尺目不能承睫氣不得納息黑裊障空燐煙  
蔽江橫屬排蕩扶擊舂撞擬效順思投降提獎之主怒  
莫敢當忽風斂而川止活殮喁於鼎湯噫嘻吁此其瑣  
瑣者耳華陽之往躅肇於文翁悉於太冲纖侈日滋繇



是鑠景福盪醇風鬼嘯高居神泣巨峰棧閣如砥萬騎  
突馳火連摩圍氛翳峨眉築京觀以專戮甚彙街之陳  
尸順舟而下者十不得一緣澗歷塹視京坂之豪釐崎  
嶇古渝前彭後余保衣冠之弱緒猶興文以舒徐逮夫  
六合會同彈丸震驚發渙號以凜雪緝政俗以治平則  
夫兩州之土民無遺鏃之害歌帝德以底寧會稽生仰  
而愀俯而笑在易之象復存於碩果物極者斯通盛過  
者斯禍維今老人熙熙其天休休其心事至不忤智藏

金史卷一百一十五  
卷一  
惟深式是表儀化而怡淫國有耄叟鄉有善人仁壽錫  
名爰則其淳感古樂今茲其為擊壤之堯民

樂水圖賦

東坡先生脫遠游之履衣紫絲之衣與黃冠師跪坐息  
機臨清泠之淵憩巨樾之陰意消言忘其得在心飛泉  
琮琤寒源杳深悲塵寰之隘險抱奇璞而莫陳將以善  
夫濟世之極樂至理以自新維茲水之無倪非智者莫  
能以鑒彼河伯之好夸終望洋而浩嘆翳西海之沈羽

竟其說以恠誕小大不同其病則通駭於所聞者忽所  
見誠哀乎舉世之盲聾余嘗披神禹之地圖考先生之  
轍迹而誦之方其發軔于瞿塘千里一瀉鑒燕安之醜  
媒悟孤孽之非禍雖盛氣之飄忽已足窮物理之化迨  
其中年倦趨分符東上慨河流之奔駛城不沒者三板  
先生胼胝以先激而返之有以遏其性之狂悍伊文登  
之貝宮空百幻以自獻實精誠之冥通異燃犀之獲譴  
至於羣妖肆憎百懾相乘先生怡然而行試正命於巨

浸儼安流之無驚耿耿明夜乘槎南歸海若息波馮夷  
効竒混六鑿於一噫信天地之无私匪深於水者其能  
若斯耶玩王孫之游藝弄五采於素絲聽之而無聲即  
之而若遺若然者欲以求先生之所樂無異畫餅之充  
飢

餘閒齋賦

曷不觀夫農父之治田春耕夏耘晝作夜緝望歲常有  
思憫苗若不及候其陰晴謹其涼熱食不滿嗛目不承

睫穠事告成以祀以享入此室處曰余將有養休其四  
肢里閭熙熙甕牖迎陽茲其為一歲之隙得以自怡者  
與古之志士範圍天地之初冥搜密籌心如淵珠據會  
以集要積神以合虛冬爐夏葛謝而弗居逮其蓄極以  
通若燭計龜卜物莫能沮燕居申申欲不踰矩倚門而  
歌聲裂金石恢乎其有容順化而有得蓋其勤者若此  
則其終也迺以豫佚惟昔賢之肥遯屹乎其頽波青林  
扶疎擢茲瓊柯味道以觀澹乎不頗閱世推移飲茲無

何養其粹精不激不阿有客仰止撫其嘉名以處以息  
慨然而言曰悲濁垢之駢臻御吾輪兮馬窮蹙逐日以  
道死異惜陰之度功厥今金馬公車履舄接踵承色以  
求為疲為冗退食以休濯其靈根藏真養恬疏清滌裨  
庸式庸侶著于門顏維四民之有制實士農之居先情  
于初者躋于後弊于智者罹于艱歸休乎君援琴而歌  
曰羣動兮夜息貿貿兮吾徒曷猖恣不能以自適書兮  
在度寧兮在席復吾初兮以無忒

息齋賦

慨太素之日凋服仁義者亦幾乎外馳百幻眩晃衆愛  
糾縻側身於積薪之上試命於累卵之危髮盡化而齒  
將終竟不得要領以自持端木之智工於言結駟之德  
色索其中誠餒然也史遷之足老於行悲憤之書不能  
以全其生也東門之悔華亭之悲是猶碎轂而大輻掘  
泉而止渴何其遲也古之至人止於其所不止休於其  
所不休兢兢惕惕不得而名之強名曰息夫息形者神

清息事者愚絕息心者心愈馳息名者名愈徹莊周之  
息影為荒唐陶潛之息交為慨慷是皆未得其當若然  
者其必有自息之方夫知古而不知今謂之陸沉世故  
之岐多人事之機深生乎下都兮又安能超舉以絕塵  
惟李侯之靜好藹鄒魯之淳風不求異乎人默息以底  
于鴻濛振纓而趨簿領如焚上下雜糅石臧混淪一息  
而求之何異解牛之芒刃眇目於毫分也退居申申圖  
書領賓不喜不愠寂然舍珍吾有以知其息之外陳者



矣夫天地之理動靜濟焉偏一而用則為五行之沴人身之氣如車軸窒而不流則為疾癘為未廢若侯者其何以為息之體而余以為外陳者豈侯之意歟他年成功而歸晞髮於彭咸洗耳於箕潁味乾健之旨以極君子之理吾不知侯之所謂息者其信然耶其寓言耶

凝雲石賦

為張希孟作

文登之宮積濤成雪天風蕩摩海氣幻滅嶽崙蜿蜒堅若金鐵大者成巒小者成穴蜂房羣綴蟻曲百結爰有

張子挾竒發珍藉以文錦炷以古熏陋博山之侈靡髣  
爐峰之氤氲湛然塵消號為凝雲有客哆而笑曰南山  
朝隣奮搏無垠太素為母五嶽為賓合虛成形積潤以  
神今子友一拳於几席雲何自而凝哉張子倚梧而言  
曰窘尋丈者不能以喻大語荒忽者適足以資恠人惟  
至靈品物是賴明而通之呼吸萬籟決為奔騰興為靈  
霽其來無趾其去莫闕唯古至人韞玉以匱藏明于幽  
養神于獨內澄外觀嗒若槁木靜以自儀無喪無辱念

此石友其德不瀆燕居相忘庸以熏沐則夫所謂凝雲者不待於外而自足也客喜而悟遂為之賦

紅梅賦

閒閒羽仙朝歸絳都冰渟雪峙湛焉澄居候寒圭之微影察衆芳之榮枯草藏葦而永閤木脫葉以無徒彼陰陽之眇密曷能返乎玄虛於是天迴景溫機扶候促吉雲豐融美虹纚屬睽炎洲之嘉植渙乎其忍此垢濁也儼藥珠之揚靈貯初服於太素沐九芒之粹精蟠翠氣

以內護頰容耿以自持兮抱冲密而莫吐衣赤霜之羽  
袍曳文錦之靈佩棄明月之寒璫綴飛瓊以為琲匪徇  
色以自誇表昭質之莫昧凜世全之如焚葩微愠以卻  
背惟深根固蒂之不可恃兮將求化以養晦繄煒燁之  
滑稽懼夫惡朱者之見毀鵠日浴以馘離鶴舞丹而希  
壽念形色之莫踐徒變幻以眩售萬籟凝寂穆然長思  
絢此的皪申之以辭辭曰貌充心明道之腴兮葆光罟  
貞慎德樞兮渥丹自持惟受初兮不爍不騰莫可踰兮

時至神完吾其數兮吾其數兮物莫與俱兮

九華臺賦

混元之峰鬱為仙閭霏青駭紅嶽崙相扶下垂清溪百  
流是趨昔有羽士恍兮承跼縞衣玄裳其化莫追爰有  
堯年之叟植杖戒鉏顧瞻童土式崇墳壚黜幽導竒以  
薙以除層臺演觀積成為郭拾級以升家林滿圖迺擢  
孤芳絜泉廣疏錫名九華葆茲清腴有客蒞止披情徐  
吁曰登高能賦大夫之職也為我賦諸客曰皦皦廩秋

天風奏竽哀鴻赴空寒蟬抱梧脫者如掃縮者如枯落  
妍歛英還形太虛存莫可禦去莫可居相彼九華孰為  
有渝含章金衡承元坤輿弗媚弗私苦心秉愉迴黃抱  
素包寒紛敷飛霜溢露言沾其濡獨立養完孰云彼汙  
世服姣靚飾脂效姝嗜腥秦醇澂甘芼莢維爾茹口哆  
焉如荼耿持空榛曷知我蕪叟曰好不可一鴟鴞唧蛆  
鉤以為直石以為琚變奪五采睢睢盱盱已或自售適  
增詆誣寄懷於言觴至不餘九九默操嗒焉遽廬我生

之辰天清景舒庸采以脩庶其遂初山空無塵白雲在  
裾歸與歸與吾以子為徒與

墨竹賦

屹書林之邃清襲空翠以膏沐察羣芳之交妍糝紫芝  
而不肉化蒼煙於寸穎皦森束其寒玉有客叩門指而  
言曰天天申申吾不知其親悵悵歟歟吾不知其怨懼  
獨立之絜矜徒三刖以自獻爰有童子擁篲以前曰東  
南之美以植則繁大盡斲採小為烹煎曷扶其清孰床

其生零西摧東山崩谷鳴取億及秭莫知我名維我先  
生念茲磅礴探玄窟之太和布靈根於眇邈取方諸於  
承露和不死之至藥寄遺跡於須臾避玄冥之饕虐故  
其凌風出塵廓兮如神承春飲鮮從兮如雲疾掃却顧  
猶歐冶之鑄郢人之斤也且客獨不觀夫鑑之與形媿  
妍脩纖各窮其精惟靜者能以燭至動而所謂談譎變  
幻迺足以覈萬物之情望南山之崔嵬目九日而不瞬  
匪好夸以眩竒良以解夫謏聞者之愠語未具先生振



衣坐忘與客相顧卷縑以酬一笑而去

素軒賦

太原白無咎徵名字于易復以素名軒實維其祥乞  
賦陳郡袁桷賦曰

維太初之混茫兮眇昭質其孰分二儀迭其交媾兮肇  
清濁而成文翕九垓其同風兮佩鉤矩以播芬邈焉黃  
唐之仁聲兮極黼黻以成憲忠與質其相環兮迄蒼姬  
而莫變亘終古之同軌兮成後來者之過眩徵載籍於

竹簡兮淳風鬱然以未墜憫太和之淪胥兮希絜已以  
自致三熏沐而揚靈兮儼前聖之遺旨悟宣尼之自筮  
兮繇告之以不樂曰丹漆不文兮白玉不琢質不可以  
受飾兮道不可以雜敦厚靜止兮弗居其華惟無色而  
自色兮物莫能與之加爰錫名以表厲兮雖顛越其靡  
它凜世垢之泆忍兮斬旁證以冀直聃演言以清淨兮  
戒目盲於五色墨諄諄以兼愛兮悲焚如其何益冕朱  
裏而外玄兮袞襲裘而不裼淡玄酒之無和兮輅盡誠

而越席顏執仁以不違兮炯虛室之內煥商舉隅而起  
予兮懼絜矜夫倩盼噫童子之微言兮警魯氏之華睨  
捨沐浴以孤泣兮兆有知夫孝子乘結駟以夸容兮終  
內熱而殞愧車美澤而可鑑兮曷栖栖夫靡止彼馬師  
之食藝兮亦能遺玄黃而洞理羌若人之好脩兮妬芳  
澤之日恣將乘飛廉以上征兮揚古帝之正則惻惻歎  
歎而彌貞兮固丹府之介特書盤盂以參倚兮慮夫龜  
之不食揭嘉名于戶冊兮振白首以莫忒申以辭曰茫

莊重玄物之先兮剛柔相摩文以宣兮反初復真德迺  
全兮履素莫渝吾將以無愆兮

冬窩賦

濟南潘仲德家商河治其田廬塊土累石以處左經  
右子刻意厲行斟酌度古昔將力避世不復近歲終順  
陰陽之理慎居于中而名曰冬窩未幾聞于朝為太  
史屬太史職清簡仲德獨憂之復以昔日命名者揭  
以自警余聞異之為之賦曰

噫嘻夫世之善養名者豈惟冬與朝而興夕而趨執轡  
在手承塵滿裾僕夫告痛寒冰厲鬚剝飛英於窰數巧  
膏沐而睢盱懼分忽之不前戒良辰以先驅矜清揚之  
婉婉猶春溫而于于何自而冬乎大盜之智不以胠篋  
巧賈之利不以操割蓋將足不超閬而踵接其席目不  
承色而議推其德美容我我雅言迤迤爰處爰居載笑  
載歌閤無傳之靚邃又何為乎冬窩也哉潘子曰不然  
冬為天終萬物蓋藏陽微如芒外枯內傷甲者若縮伏

者若亡裂者為阱凝者為防歛吸以吹浩漭莫當口含  
飛霜睫承流漿三光青熒五嶽仆僵故其蟄處也隆然  
以龜深息而卑卑其徐行也斃然據危俛僂而施施疏  
房上宮連氛累靄嶽嶺阻深束縕以載鑿坏者遁煬竈  
者遜當此之時食不飽菽藿衣不襲裘輶悴悴然角進  
而憑陵將弗折而自缺且夫藏明養陽必謹其獨大智  
若辱大容若谷紛載籍之蘊祕糅衆說之桎梏折精華  
以彌縫豐蔀屋之光燭吾非以嵯岩為居鹿豕為娛友

幽闐而棄斯徒也念居蠖之未伸凜自縮而不惴謹清  
寧以冲嗇御六氣之寇沴將以游乎萬物之初順四時  
而成歲也

榕軒賦

南粵之區溫風憂摩積炎吹雲流金為波少負老息盼  
茲庭柯爰有弱木攀緣嘉生連理纚結附枝膏凝蔭旋  
萬牛廣容專城千柱承宇百尋傲空羣焉莫爭希賢同  
風長與少殊如昂如顛溜微生於一髮寄豐壤而敷茸

詎擁腫以丐全眇頽波之容容厥類滋夥其名曰榕東  
魯先生見而笑之曰目無常形嫫母以為能耳無常聲  
折楊以為清美醜相乘孰完其生眷茲連蜷棄諸同辭  
薪者鄙之斲者訾之輪者絕之器者揮之夫好惡不齊  
莫與之爭吾何行焉舉觴以噫噫極而歌歌曰木之詵  
詵匪委佗兮木之萋萋匪婆娑兮巧為彼矢名為彼戈  
徂徠維松新甫維柏柰何柰何客有踵門而言曰議物  
產者必以良舍所用而求無用將安所嚮先生曰多謀



者神泣多才者形傷維彼阻窮百虐備嘗蔚然以修充  
然以光四海立賢勿云其方窮髮之北殆將馭兮榕兮  
榕兮吾以為楷兮

復庵賦

為恒山李  
謙父作

揚子之衝千流交趨蔽帆雲凝炙轂雷虛塵奔瓦聯擁  
關蹋衢土衍隰勻深耒廣畝百技眩衰千賈獻姝爰有  
倦游之叟卜龜食吉構茲廡廡不斷不甍茹玉芝而三  
咽膏玄髮以若漆與客瞰空觴而言曰今夫所謂歸老

者其名鮮鮮其行爰爰脫機於韓廬之叻息影于菟裘  
之巔造者絕履奉者謝饋嘗仰屋以嘆感極以悻悻極  
而悔黯崦嵫之吳離揚滄浪而莫蹟若是者吾奚以為  
歸世有習靜之士逃聲於無形避害於有名山鬼獨嘯  
悲猿凌兢掩耳疾匿脫焉如驚是焉知天地之性哉磅  
礴之理不能以獨運慘者舒者疾者徐者足以窮萬物  
之真維昔此邦犬牙東南前江右山朝煙夕嵐憑高而  
望則去者如箭淨者如練杳杳如線效者如獻日出而

作連岡燒空交蘆舞風土臺崔嵬野田豐茸昔之荒煙  
萑草恍不知其處所寄遺蹤於白鳥問秋風於賓鴻夫  
觀萬不同恒維其機今吾乞身於未老寄此土而食於  
斯也素書滿牀旨酒在卮鄰熙社恬子順孫祇不脂不  
韋不激不靡視昔歸全而索隱者相去幾希靜者動之  
根息于外者其內若楚川流徂東龍返為雲日沉于淵  
朝升為暎其本元元其生芸芸簡兮廬乎覩無渝乎又  
何懷乎土乎

擬剡亭賦

為吳成季作

英英維祥織流成章雙峯嶽崙紫芝熒煌峙立澄冰玄  
言飛霜爰有化鶴之叟迅翮珎館舒風盤霄歸而歌曰  
茲山兮沃膏陽霏兮夕濤吾還兮不崇朝將何為乎逍  
遙昔之命駕者興極而意已盡卧游膏肓者不千里而  
接軫去若隙駛留若柯寄情不及親豈我輩之謂耶彼  
櫟輪囷爰衍爰漑彼桂扶疎以嗣以賚養苗者擢其嘉  
牧羊者去其害植楹兮鼇負布甍兮鱗萃我季兮圉圉

孫並曾兮陳廡蹇獨余兮不留目凝睇兮屢顧芳菲菲  
兮在林誓將築兮奉所欽卜龜兮于庭諏言兮揚靈彼  
簪兮奚投返真兮思冥學道者天完逸老者延齡順以  
養榮息以固形刻意枯槁者吾猶謂之善盜而我之髣  
象豈果有所羨而自表者耶道本於無名擬之而變成  
鉤深者泉如珠在淵遇風為漪激流為川彼剡伊何源  
遠不遷則而企之於亘斯年

餘軒賦

為程士  
安作

世有好名之士佩玉長裾鳴騶導衛候者接踵對者奉  
諛日三接而色喜坂九折而懷吁欠伸委蛇顧而子孫  
且言曰夷考昔人吾何能擬哉榱桷闕空旌旄樹霄部  
曲中街膏壤近郊悵兮屏營慨兮鬱陶若是者何囂囂  
也爰有靜士卑然素儒載冗為興游物之初粟不滿缶  
屢空泊如爰笑爰處擬諸華腴昔東方生見戲于侏儒  
翫世味道忘身之遽廬維程子客于江之南幾四十年  
幻者如飄風逝者如回淵禍生於公鍊罪成於細旃撫

心以思孰省其愆往游于其軒太古為春無懷為年探  
圖宓戲受歷軒轅在易大畜剛止以育德日新而自足  
者也昔之至人道充以為富聲出金石柳生其肘席不  
蔽坐飯不充糗今子之居酒時滿箚蔬時滿把視昔之  
窶者溢且夥矣程子憮然曰吾誠夸矣

隱居圖賦

陳子築居唐輿之山復繪隱居圖撫其某水某丘之  
雅名署於其旁以寓朝夕不忘之意每遇佳客輒指

以示若挽而使之游從於其間也間謂袁桷曰夫畫以髣境畫之所不能及者吾雖知之而不能數與人言之且境必有趣趣之精華非言不傳也子其為我撫名以發其趣桷對不敢辭迺為之賦曰

陳子倦游江湖整轅言旋顧瞻先廬徜徉里門四壁寒寂頽然維藩詢閨閣之遺跡儼中堂之猶存弔零落之舊叟撫徬徨之驚魂於是悲極而喜喜極復悟悟而言曰人生一世惟靜者智盛不可持翫不可恃三家之市



其行跂跂四達之衢其言姝姝一以巧為媒一以醜為  
居吾懼其獨立而誰與趨拂龜以占兆於唐山之隅若  
質而華若翳而明缺者如玦環者如城相其陰陽築室  
繩繩被以杉松潄以芡菱棄塵世之喧歎牖乾坤之清  
明爰命雅客展以輕冰之楮化以五采之穎織濃如春  
曲直若領吐秀獻奇發牘炯炯鄰輞川之清妍敵草堂  
之幽靚故雖踰江越嶠適市造朝挹此粲者神凝各消  
有不待北山之移八公之招也客有言者曰擁裘而歌

者意率類於慨慷登高而賦者事常失於荒唐吾敢按  
夫子之圖而代言其詳東越之區山水冠世發抉地靈  
前王後謝維君之居敞若神界若迺石塘界其前雷峰  
守其要馬領冠其巔羊巖負其輿周以青鮮橫以磊砢  
近若迎笑遠若却坐嶽峯何山挾輶以殿浮游閭峰振  
弁以見上有石屋梁欂參屬紛披寒苔聯絡怪木恍飛  
仙之遺跡鑿幽竇以守獨前林杳靄丹光騰天伯陽一  
去而不返玄鶴盤空而將還飲石室之寒露問山人之

何年然此特隱居之外美析而舉之有不可勝言者矣  
晴原漲春千桃爛雲飛英滿溪織流成文支寒藤之瘦  
骨度略約之微險解瓢斟泉一舉三咽藹桑麻之故交  
爭聚首而繾綣前有惠林濃綠婀娜投冠解襟脩然清  
夏欣衆葉之敷陰訝楞梅之吐火秋畦離離黃菊爛斑  
爰泛黍酒駐茲頽顏懷千古之處士酌悠然之南山歲  
窮境空長木號風寒岑晃曜歸然中峰渟膏溢銀噴如  
飛龍匯為澄潭窮髮鑒容烹以碧玉之鼎淪以雲腴之

茗神清意寒語爽心冷蓋將忘塵世之事而深以內省  
也相彼雙門園茲羣山清風常來客去不關圖書自娛  
鄰社莫干有堂寬閒扁茲嘉名悼白雲之何往悲先友  
之日零瓊樓舞空清曉萬變默坐以觀翕忽詭幻賓天  
衢之出日駛青紅之紛眩鳥衝煙而辭枝兔驚林而絕  
坂嶺濛濛而人度露漙漙而葉顫念哀鴻之相求時遭  
我以好音緣小墅之橫岡花竹儼其成陰悵舉世之莫  
從歌風雨之苦吟迺歌曰歲將晏兮莫留過故居兮懷

憂山坡陀兮四屬吾拮据兮以屋懼世德之顛隕兮習  
肥遯以藎穀駕余驂兮屏營耕石田兮果腹究出處之  
何心兮幸余髮之未化為我語山中之人兮吾將歸老  
于其下

清容居士集卷一

欽定四庫全書

清容居士集卷二

元 袁桷 撰

騷 辭附

愍誓 哀謝先生

受穆清之元陽兮一精白以抗修閭闔眈眈其初麗兮  
執正辭以告猷黯朱光而不燭兮妖羣立以縱恣飾詩  
禮以逞誣兮曰余將焉所詣宵臆結約而莫達兮史告

之以寡言心屏營以靡置兮導禮旃而為之先揭德華  
之魁壘兮勵來者之不前一成旅以興邦兮屹然莫余  
敢擬州纍纍以十百兮夫何寬衣而廣袂燃積薪以逞  
安兮羣蓐食而自戲竭精液復疾呼兮卒莫能進其詞  
振飄風於林籟兮葉脫故而懷新衆喁喁以雜居兮蹇  
獨立而號呻矢危忱於帝閣兮星委地以如珮何執愚  
之慎矜兮守隘說於顛沛持空薄之一髮兮振千鈞於  
層冰力弗勝而殆兮猶夸夫守道之經企女紀之傾軋



兮極迅翼以恣往九疑靈妃慘玉容兮鏗鼓瑟其音蕩  
重華倏焉以冥邈兮凜舊德之日喪乘桴游於中流兮  
海若息波以竚望棹夷猶而靡行兮羌何為乎此路若  
然揚靈窮晦冥兮朱鬣乘旗挾以震怒澎湃蕩簸激回  
渦兮爰深逝以歆戲懷縮慙而失據兮寧忍歸夫故居  
死無能終報兮生莫知其曷圖貴化人之冲漠兮絜肥  
遯以自遜蒙垢紛為汙濁兮薄日月之吐吞鑿門竇於  
荒滅兮屏精明以黜聞超飛霞而上征兮遇武夷之神

君逝者翳于山丘兮夸誕逐其營魂覽三聖之古簡兮  
宣尼實為之彌縫謂道無古今兮孰與之傳虛九九而  
內明兮剛柔錯焉以敷宣翫朝步之奇文兮握奇五以  
黜煩建中極而滅端兮成品物之自然湛然一以貫兮  
曷知其後先數京垓以成變兮迎拒之而莫偏斂莫知  
其跡兮為道之全夫形既不可以久擅兮神與之為橐  
籥迫朝逐而日騁兮引正命以自絕棘戔戔于車道兮  
精離榦以蕭屑秋陰惜其淒骨兮熠螢光之明滅手三

秀而不忍茹兮腹殷殷其雷裂奄兮愀兮忽以放逸兮  
何昭昭其章徹亂曰玄神凌兢兮命壽不得長闡茸曼  
衍兮既樂且康衆皆馴怙兮靈胡然而秉方擷雲英兮  
微光佩雜芳兮彌章駕赤鯨兮騰驤絕六虛兮放八荒  
注北斗為漿兮內熱不敢嘗林有桂蘭兮水有鰕魴所  
思弗見兮奚故鄉挈眇風兮樂未央吁嗟逆化兮寧恒  
傷

廣招

深寧先生乘虬上征江海殄瘁湘纍遺痛千載猶一日也柳車爰行瞻望永隔門人素桷竊取宋玉招魂述廣招以反其義其詞曰

竊獨悲此翳濁兮身鞠恧而莫明服三后之貞則兮秉忠純以內兢繩古義以自抗兮懍微躬之莫勝懼天命之不吾與兮晚更號以深寧委靈魄於玄宅兮挾清神以上征重華憐其無容兮矚下矩之險隘侈九夷之曠邈兮申前聖之遺戒一去而莫返兮八靈孰能以震駭

乃命小臣戴緹秉旄注精高冥而下招曰茫茫封丘廡  
豕萃只炳靈奔飛杳交會只嬋媽清芬孰返旆只縱橫  
幽房雜厖怪只魂兮歸來其益以馭只東門熒煌平蕪  
層陰只靈宮紫芝萎以泯只流鈴搖空訴夸淫只玄蛇  
蒼鼠若擾馴只魂兮歸來激越吟只題躑蹂躪白蟬飛  
只滅方鑿迂傳致以肥只闢青綴白眩纖奇只折楊黃  
華司體儀只魂兮歸來彼相疑只沃隰修畛鞠薺茂只  
狂夫冶游胡憺後只南山白石曷以永年只式擷其薇

悵周原只歸來歸來其孰能寐魂只愁雲旋宇陰籟振  
幕只素空霏塵清晝激電只虎蜚黃目屏陳設只精鑿  
後置爍蟲施張只伊鳴仰天雜猖狂只甘腥恣睢禮不  
可防只魂兮歸來悉無以當只魂兮乘桴登瀛壖只海  
觀日浴爛紅殷只哲容長裾襲古先只漆書竹簡遂研  
鑽只崑崙穹隆疑有至人只妙顏紫韉休德日新只吐  
珍納和與道為鄰只雕題祝髮禮讓興仁只桂蠹咀吞  
味芳辛只幽蘅嘉芷佩孔文只相羊湘纍盼若存只承

挹清塵徘徊翩翻只天光淳耀會弁森扈只肅容展威  
受多祐只斬几破觚斯皇輔只龍圖昭回布高矩只開  
陰閉陽庶類蕃嘉只捫歷箕尾建崇牙只翦理姦巫靜  
無譁只照示下土循義媧只河公海神瑰以迅只貝宮  
鮫室祕怪雜孕只瓊英琪柯錯繽紛只鞭龍誅蛟霈澤  
湛潤只魂兮遠游戢凌紊只揚歌舒嘯化幽憤只重曰  
嗟所思之不得見兮儼冰雪之遺容繄遲遲而容與兮  
松柏日其蔥蘢悵憧惟之咫尺兮長虬脫焉以追風蛻

塵居之險艱兮捨崇蘭之新封  
塤簾迭其和奏兮聯雲  
車以陪乘粲琳琅之遺編  
兮俾泯絕之足證匪離羣以  
自繫兮誠不忍夫騶騁超整  
駕以言從兮懼見譏乎後  
聖揖虛漠而言旋兮耕書曰  
以振厲諒神明不吾欺兮  
庶終承乎嘉惠千秋兮靡長  
白雲兮相望魂兮歸來其  
毋我忘也

七觀

翰林先生納榮息機謝白玉之堂將歸于麻源之山房



越公孫懷牘濡頰託物喻志考圖審曲若鑑之納視言  
忘而意消類別而理備有郢大夫癯然褐衣目不接乎  
黼黻耳無聞於律呂韞而言曰登高能賦淫曷荒忽智  
專者魂強形滯者物逐昔吳州來觀詩東魯言有度微  
有據厲階於枚生濫觴於曹王先生楚產也雲夢汗湯  
巫峽嶺岷冑藏腹蟠公孫不足以教我先生殺青南山  
積簡羽陵若網有網若墨有繩舉凡暢微我其聆諸  
越公孫曰太素烜燭清濁莫儀雨風露雷動植攸孳辨

方審良民用不疵六氣以沴日天其世彼諄諄者皇曰  
汝命實長厥土燥剛相其溫涼我生命在天順以受年  
巖居谷飲中道以隕執書以觀有涕洟瀾陋彭鏗之逆  
理兮何恣縱而益顏言技可以進道兮吾當繇是以返  
觀納腸補藏懣忍莫竟石立土踊孛彗迂逆吾猶以為  
天地之病也脩身俟命道之大經先生之正也大夫曰  
神之所行何體何方拘者為儒請更端以告僕夫

越公孫曰靈曜宣精五紀順明察幽考微法天以行形

氣芸芸吉凶卑高觀象以分韜兮靈根感不以言繇動  
彰靜百神受祜虛者為音質者為數昔后稷氏之職黍  
稷蕤蕤智者過謀胡盡其地力民日作慝相攸食墨風  
雨斯蔽連雲岌葉飛不得垂喙履不敢仰視旁營萬家  
地記萌芽赭衣僨蹶而淮水復絕鑄鼎伏姦能沉于淵  
吁嗟而求桑林之羞要荒擾馴王會盈庭獻琛効珍物  
不可枚陳雞豚以時父恬孫嬉何助邊葭思屈曲洲島  
家累千金資先生昔居列僊之館據要集思謂象以理

明妖由人興守諄芒法清寧却走馬于郊謝重譯之雉  
陋三脊之茅熙熙陶陶舒舒夭夭不言而歲成無營而  
事貞夫子不云乎一致而百慮其是之謂乎郢大夫曰  
汎觀博聞於道彌損願滌耳以挾其蘊

越公孫曰粵昔尼父唯俎豆是數擊刺坐作因民以教  
蒐苗獮狩車徒卒究厥今輿圖八表同厯四貉交軌月  
竈風丘冰天桂海馳心望雲請命歟塞千廬星環八屯  
山列羽林繡經飛騎鼓笈然而樂成者難與圖事守文

者不足語智嘗聞之兵農同封耕戰同功魚鱗鴈行敵  
莫我敢當府散籍移萬姓流離強帥拉脅外寇慙肌卒  
不可拄支後王鑒觀法日以繁厖者罷者恆者羸者駢  
頭引吭食粟而嬉開門納兵百郡是師何草廬高吟崎  
嶇雜耕何杜氏之子傳癖孔深而緩帶以征射以容觀  
劒以氣言批亢擣虛孰知其隅折衝厭難莫窮其畔至  
若握玄圖視龜文縱橫起止與易象相表裏者驟語之  
吾懼大夫之竦眙也大夫曰兵者不祥之器未效此知

也

越公孫曰炳靈心君闢乾闥坤情聲相宣立度出均昭  
昭鴻藻緇縹是存敢先論楚材而言之漻漻乎形畏垢  
而將翦也霏霏乎睫承露而欲訴也荒蹊斷葦燐滅沒  
而疑聚也織文揚徽攬芳菲而雜組也少焉商飈號鳴  
金石琮琤逐虎搏兕犇鵬鋌鷹寄莽蒼於一瞬乘扶搖  
以孤征終緩轡以就日愴倏淪乎西傾噫悲何為哉古  
有巖居之士抱奇挾幽漱芳深林憩寂凍流憺乎其若

遺竊兮其若留鉤盤助之為回旋虛牝答之為獻酬猿  
三疊而墮淚鶴九轉而凝愁鉤玄採微迄無終窮瑤席  
敷張高歌慨慷語初麗而終放託餘韻於宮商然此其  
戔戔者耳攬拾蒼雅刮磨誥盤微粲貝編飛英露溥何  
譏乎肉食之鄙猶鄭穆而魯桓也大夫不聞之乎鐘石  
絲竹各隨其聽隆汙有時其所遭者命摩盪堪輿吸呼  
羲娥矢為帝詞叶為賡歌五嶽贊襄百靈護呵不棘不  
茨如砥如磨發潛漏泉披民陽春瑰逸為新簡絜為真

列若戶居別若渭分雍容者珩璜冲遠者英莖縷絕而  
緒續醴甘而齊清昔之擅名偉著耿兮其不能以十百  
程也浮聲切響直意肆志澎湃旬溘滔滔莫止据理者  
夸飾言者哇娑母兮姑射鉛刀兮鑌鉞審莫任兮奈何  
大夫曰文章與政通玉署之職也文勝質則史更言其  
大者

越公孫曰矻矻中壘校讎靡寧世本年紀繫于麟經捨  
相府圖書泯其緯經炳麟金匱汙罔敢配迺司馬氏決



榛鋤翳麗者為譏激者為刺升陟世家表籍作紀言諸  
侯無史史立周圯鄙儒畫墁削章刪凡燭火並日卒漸  
盡莫傳昂昂荀袁辭約義完何班范家至耿光綿繇相  
繼擬述百世一律素王簡編如日在天熒煌高張孰敢  
附肩鴻化以漓研探益疲穢者闌者襲者濫者泆忍畏  
禍希企市價諂不表直俚不師雅若鼙鼓鐘若盲策馬  
元經附訛唐厯受呵後有紀略迄莫同科尹石猛志證  
古比事百不一試歐陽氏出方名山所藏復大同而小

異勢不兩立其魯史之謂厥今繫謀川盈記註櫛比故  
志存廢興之源典章酌損益之致登瑤山而神駭游鄧  
林而目眯般倅効吁隨和發涕操觚之士吾將見其心  
赧而神悸也先生登祕丘覽羣玉積石倉標朱目墨兵  
筆削融液乎粹精囿赫胥鄰大庭大夫宜從下風而乞  
靈也大夫曰皇王惟熙帝霸孔巖我心增悲韓愈不為  
史名以四馳何庸知焉

越公孫曰煌煌古帝別生聚方煥乎陶唐五服正邦五

典率常導之無違民用熙熙授之以時聿來孜孜降于  
三王厥緒曰孳集成于蒼姬黼黻憲章金石命令緝熙  
太和宣昭羣姓纖鉅之備絜乎其有秩也豐殺之制屹  
乎其有截也三光重輝百辟拱列歲時易移而浸淫蘗  
芽弱者綴旒强者鋌戈智者探囊勇者拔河搏犀象屠  
蛟鼉飛矢請命旁午係車焱乎浮雲迅乎奔塵炙轂滑  
稽之士紛然而並陳棄仁恩假鬼神混君臣各馳騁而  
懷新數千百年人亡而說具勞乎離婁不足以一視也

藹乎王良不足以一御也其最大可病者恬泊守真可  
以養身不可以治民絕性棄命黔首蠢病孟軻氏有作  
吾見其髡鉗而舌咋也言未既郢大夫曰天藏山中瑾  
瑜匿瑕問以辨之厥德日華儒者詬病卒不能以勝何  
道最高子盍陳之毋激毋勦

越公孫曰古昔顓童受業閭塾書數首通訓故是屬聲  
歌象舞目接身服相親有恒日用不瀆後帝不相襲緣  
祀興文八音寥寥五禮紘紘鏗鏘莫明而聚訟若焚鄭

說乖誤後圖踵循象制益湮周官別出議者欲一繁紊  
綜錯操網而入林適越而轅北也類禮孔勤五厄莫存  
後有倣補去取未就卒乘虬駝雲字以文合聲以音比  
旁行敷落侏離狄鞮文軌同風不能以一致孔壁莫推  
二經蕃蕪聲牙為今簡儷為古謂道統是傳曷敢有語  
詩基文王而周召先興首章異同衆說沸騰風雅變言  
美者為訾直者為詆魯頌紀異秦誓告終何後學曹曹  
迄莫之通麟麟魯經議口法吏謂齊晉無褒而日月具

刺紛若蠶蛸眇若糠粃不虛其心不明厥視遺珠抱疑  
探篋積毀然此特人文之經緯政治之用體也三聖述  
作包河總洛二儀生于心萬化制乎神迎之而莫親拒  
之而彌存疑者遁者愕者困者湛兮消兮委兮昭兮沉  
思遺物形離超兮激迴飈兮閭而寥兮縱雲翺兮憺兮  
儒先從我招兮郢大夫曰始吾見公孫疲飢若不足突  
梯若避辱靡精槁神何斷斷然也今知子矣永譽處矣  
吾與翰林先生徜徉此土小年大年猶以為朝暮也

桡不佞遺謀守儒號東南故家志學之歲先子命繕  
治書錄觀史志略錄部第時見舛雜稍長得博考先  
賢藏書總目硃硃三十年合傳短長迺成一家承旨  
程公作藏書山房于麻源三谷命桡賦之遂作七觀  
極道源委延祐三年歲在丙  
辰七月癸丑會稽袁桡誌

### 嶽麓圖辭

嶽司南兮齊紫冥懋陽德兮炳靈二老兮素綦握鴻濛  
兮矢詞百泉兮一谷醺為川兮為瀆玉霏霏兮日光湛  
淵默兮含章至言兮在圖同八方兮遂初重華逝兮不  
返晝猿啼兮虎當坂

望臺兮薜蘿寒一士兮拮据百楹兮承宇  
軒山瓢兮以爲醕松風冷兮琅琅儼振佩兮高岡  
朱羲出兮揚靈積陰伏兮大明百泉飲兮在齒  
懔交流兮不可以止嗣德兮孔艱清微激兮回瀾

悠然閣辭

鄙之西兮峰圍圍虎豹屹兮雄姿綬蜿蜒兮紫屬旌  
駸駸兮虹垂之人兮槃阿畏羲娥兮高駝築榮觀兮  
通明手參差兮以娛棟隆兮示背榮翼兮聳喙鑑  
匪雪兮鄙



之區採有七兮日斟採鞠兮黃裳緝萸兮紫囊芳冥冥  
兮夕暉憺獨睇兮擬所思雲飛英兮山之阜為予留兮  
不遐以處秉貞兮神專觴彌劇兮益完山中之樂不可  
以久遲予返兮悠然

楊堅州治孟津金堤成作金堤辭

波湯湯鑿我堤民昏墊晝負攜地不寧緣木棲楊侯之  
來承帝則順事陰氣神以懌赤蛇蜿蜒吸桂漿百谷受  
令故瀆常彼隰柔桑猗澤維航侯言神綏曷敢功民言

侯績天心通百妖伏精金石宣明三旬有役金堤是復

石田山房辭

大梁馬伯庸寓居光州作石田山房為作辭曰

淮歛波兮練繒峰植秀兮翠旌翦黃榛兮布耕石戔戔  
兮稜稜思夫人兮造攻雲電合兮追鋒遺鏃兮齧足壤  
逸休兮果腹神符一兮告祺藹惠則兮貽思靈之來兮  
歲祠不鄙夷兮以嬉疏房兮筍席溫風至兮靚密儼竹  
素兮橫陳曰靜脩兮手澤世芬兮日起百稔兮無數石

田兮有秋累胼胝兮吾奚以愁謹樹藝以自勗兮植先  
德兮無媮雖本兮穎豐導泉兮澮通夫豈不知有善歲  
兮吾曷敢燕遨以幸逢望八公兮巖巖王孫悄兮莫還  
積荒幻以自迷兮捨息土而弗芟衆芳婉其披離兮秋  
霜慘不能以實謝紫芝之療飢兮治精鑿以煉質亂曰  
苗誵誵兮善吾耘兮日出作兮永裕樂兮學猶殖兮吾  
將以為則兮

雪江圖辭

雲玄積兮素摩挽義車兮馮河蘆戢戢兮倒戈岡伏匿  
兮鸛鵝昭朗兮夕徹羣動寂兮影滅超逍遙兮一舸食  
穀精兮腹羸地險兮曷憑馬飲波兮夜騰委素練兮宇  
清舉皓首兮吾奚以屏營

垂綸亭辭

為宋誠父作

漢滔滔兮日傾東滄浪兮泠泠寒一士兮沉冥垂芒鉞  
兮不屑以冒明玕兮貝宮朱蔚兮青葱魚戢鱗以為衛  
兮龍騰章以屏氣謝媚嫗之嘗巧兮口垂沫以縱恣吾

寧養之以歲年兮寶祕鬱而不宣豈直鈎以違衆兮守  
釣道之自然時至而迅舉兮匪荒幻之詭誘保貞志以  
遂初兮考銘言于耆叟世俗眇其莫同兮永訖依夫前  
聖之所究

巨峰辭

為吳成季作

千嶂兮嶽崙特峰挺兮絕垠泉交流兮織文粲霄臺兮  
鱗鱗檜節兮松纛接路兮以遨儼至人兮清寥休德新  
兮日昭神曾舉兮重玄大帝儼兮授簡以宣曰渾沌其

無迹兮孰為之傳氣積兮九乾五緯從兮右旋逆知來  
兮順以往握靈機兮測天狀葆正命兮滅企妄受帝語  
兮還神京山之下兮雲亭亭澹獨樂兮復丁則泰始兮  
道甫成

雲中辭

氣芒忽兮孰窮其升淵迴旋兮挾以騰圓為輪兮直者  
繩握歛散兮莫名山之椒兮日暎彼獨黯兮上屯從豐  
隆兮駿奔需不進兮惓惓下土兮垢氛靈夷猶兮曷存

炯余視兮屏息桂酒斟兮瑤席法玄化兮以康食神功  
昭兮奚以跡衆甫集兮粹精愔將逝兮廓清

春雨辭

玄陰固兮內凝渰蒼蔚兮溟沐興注兮建瓴疾兮灑兵  
下土兮沃焦寥徜徉兮紫霄來弗以趾兮去莫可招澹  
幽士兮空山息視聽兮玉顏帝青廓兮籟沉虛牝汨兮  
潺湲謂彼有聲兮耳益以曠疑不釋兮詢于大塊

義婦辭

東平孫珪妻盧氏

彼棖煌煌兮過者式之黯予心之初兮孰或測之紡兮  
于房伊雛孔傷饋兮于堂我姑永望余不聊生兮矢神  
告之歲月遷流兮卒迺復之鸞鏘兮飛鵠松柏茂兮朝  
露沐石可泐兮志莫虧儼舜英兮介壽祺

哀蘭操

盱江吳允文咸淳末與家君同佐江東幕府允文慷  
慨喜論功業倚青溪檻張髯頓足籌邊事歷歷在口  
傲視府公每一至賓次席甫坐即去督府舟抵龍灣



金陵郡文武郊迎謁入皆謝不納獨允文立江亭掩  
袂大慟必求見始退未幾以王宮教授召方是時江  
淮幕府僚佐言性命道德者悉詭號為知兵得入朝  
言事而允文疇昔素論兵尤奇偉可聽故得驟遷為  
起居郎復直舍人院流離南方寓虔州時文丞相總  
兵兵侵弱允文復以平時論兵丞相獨傾下之兵日  
迫丞相酒酣與允文論生死允文未及答丞相呼軍  
校斬之噫允文要為奇男子其未答也抑將有所為

也。桷九歲時嘗拜允文於家。君坐上想其風采凜凜。猶有生氣。今覩所作墨蘭。不自知其悲之無從也。作哀蘭操以矢之。暇日當弄絃繹聲以配易水之悲壯。幽蘭兮秋風。炯命兮不逢。剡剡兮素蕤零。露裊兮莫持。望崇岡兮不得返。悵江南兮愈遠。叢棘兮戔戔。欲駕兮無轅。子中野兮屏營。芳隕失兮玉零。謂我為非兮吾何辭。已兮已兮其將何之。幽蘭兮勿悲生。失據兮死有期。思夫君兮意極從。逆化兮何隳。

蘭竹操

為子昂作

柔者不卑剛者不凌  
質質雪霜心兮以寧  
且清噫招過學恭吾  
曷敢以從

彼高者矧彼俯者磧  
各全以生不媚奚慝  
尋不可以枉寸能有所  
長亦獨何心茲奚以傷

幾幾兮叢棘高者下  
兮曲者直揚靈兮靡  
慙介石兮誰瀆功成  
者去兮孰尸其榮辱  
為佩兮弗忍以刈為  
杖兮弗忍以戕杖弗  
以扶危佩弗以服香  
其咎曷當履維德

基其無缺以自隳噫

黃可玉哀辭

孔子叙逸民所尚不同愛其近道吁是有感於世也  
耶又曰不得中行必也狂狷乎狷者有所不取矣剛  
絜養正矯矯然離垢立奇語益不合行日以褊若是  
者誠不取矣苟為之不能知知之而自警者得一人  
焉曰南康黃先生可玉可玉名石翁世儒家居廬山  
下少多疾父歌強使為道士讀聖人書能知其心謂

道與言不可以有行也必藏智顏放以自養約結制  
行非介以為異也其著書極於憂患者困之通也嘗  
曰曼容嫖節支離不能也平世易足吾何為乎是空  
巖隱穴廓然契領至則曰游聲養名非士之實踐而  
望之去聖逾遠故其所為詩文靜而不馳溢於哀怨則  
可玉自號之曰狷叟者其果知矣可玉所居室多唐  
宋雜蹟間疾作閉戶反復在手疾止危坐若思客至  
馳辨榮辱可玉閉目不復答而人始咎之嘗與余言

吾鄉善醫曰劉開能已奇疾里人病噎嘔藥不愈劉  
往視之云廬山某日雲氣開君憑軒眺引之當愈後  
卒如其言余少固多疾今疾益劇不知用劉治法可  
已否相視大笑余來京師報書言茅山陶公黃庭出  
可急購購成當同議中黃畢法未幾竟以疾死嗚呼  
可玉年幾六十死矣可哀也已學老子道志於壽余  
不志爾謂其世無侶而哀者亦介之的也伯玉砥礪  
志節歲久益湮讀其自為銘知可哀也已故為作哀

辭辭曰

朱光絜精受昭質兮煜煜靈根曷幽鬱兮鉤深索奇儼  
古聖兮德充以尊履制行兮卹彼拱壁奠皇圖兮劓以  
為隅衆引誣兮响俞突梯道之非兮挾輶以行慎樞機  
兮層冰在蹊踐其絜兮幽蘭允芳誠不敢裂兮清玄返  
真氣始升兮謝彼荒濁超變騰兮空山闌虛蕙蒸穀兮  
滄焉白雲從我招兮

林彥栗哀辭

道家言黜聰明去健羨形神始完是果為得道耶古者  
上壽百二十歲竊不死之說者則曰脩之益真其道  
彌親壽而無德與名君子恥之故脩短有命遺壽焉  
猶可言也名德不至其漸盡腐滅又安所取哉古之  
人若是者衆矣永嘉林寬字彥栗形癯而器溫其於  
學也汲汲然逐日以補有不足焉則力探簡冊以自  
證其為文必達於理而始精於詞謂詞者載理之具  
也理不足焉詞雖精無益也深思以求之旁取傳記



之說勦絕傳會據宗統原以會于一復懼其未盡是也則祕重自念將周游四方闕疑廣聞目擊而心領焉噫若可謂勤也矣道散於九流百家彌給者至矣其弊有不勝言者汎濫俚雜尸坐瞠目漸入於無聞之傳余嘗察彥栗知其心有深憂者焉余始見於姑蘇氣和以謙再見於京師愀然以思取士之道非一嚴畛域析毫髮有司者之過遺逸不舉則凡吾徒在官者誠有罪矣彥栗志不在是推彥栗之志在問學

為之而不克就若是者是真有命矣悲夫延祐六年

三月卒于京師年

闕

十有

闕

其弟宇友謹哭曰吾必

奉喪歸姑蘇姑蘇吾先人所藏遂為之辭以申其哀

焉辭曰

氣清明兮受元陽德彌中兮闇以章絜太古兮儼九皇  
播絜精兮瓊圃芳力未具兮志則專一葦渺兮濟巨川  
慨不進兮道遠邇白晝速兮陰風旋數實紀兮吾何愆  
各孔降兮神濁還靈旒翻兮木葉丹嚴夫人兮在空山

玉蓉冠兮紫佩蘭

玄教大宗師返真朝元歌九章以前導

雲飄飄丹臺何岩堯中有授經之老顏不彫三光盪摩  
四時代謝神來歸靈承帝罔敢替 謁珠庭

寥陽空洞六聖儼思九垓熙春羣黎受禧昔騰章闔闔  
通金書儼在水旱功 朝重華

五嶽莫形飛車揚鈴翔鸞騰晃金精下視垢濁何沉冥  
昔者之來運有遭今者之往清且邀 神虞娛

匪衢以乘匪車以征葢葺兮摩旌洞簫激兮泠泠磅礴  
一氣兮冥冥精思道樞兮跪瀕聆  
玄雲馳

玉几差差文織成龍章鳳翥相緯經大言鴻濛小言毫  
銖道在瓦礫匪別區念昔人世我非娛  
啟圖籥

煌煌文成厥脣嗣昌靈之紹合永貞陟降四紀心兢兢  
視彼成虧凜春冰高朗脫屣辭世榮  
靈胄光

簡兮無言默兮若存生以不生為根死以不死為門絕  
學丕傳黜其知聞五千之言世永傳  
握重玄

熙洽休明紫韉朱英侍帝左右壽考寧啓祐玄緒何繩  
繩嗣昭代歲無害佩鏘鳴兮衣絳綵

昌期運

高維松層岩岩欽玉顏養金膏鍊形以昇朝帝青周流  
萬變鎮神京

佳城高

清容居士集卷二

欽定四庫全書

清客居士集卷三

元 袁桷 撰

古詩 四言

再從姪瑛幼孤學道龍虎山自傷不能鞠撫述  
祖德以勉之

煌煌玄冑家越徙鄞隱道閔躬三世養真是生祥符觀  
光績文占籍浚儀佐邑孔勤粵有光祿亦奉于越聿魁

開封老守于括少保恂恂卑退靜閱太保靈承逃難乘

筏大耋韜明閭里胥洽篤生衛公喬柯茂豐敦讓貽則

攝獄自公絕募秉仁千人著功冥報氤氲維垣錫崇於

赫少傅受學族祖

諱覺有書解行於世正獻亦師之

習繹典謨正獻同

宇正獻首科少傅踵舉

正獻淳熙辛丑登第少傅次舉于鄉衛公夜夢神告曰汝子宜

遲上南省甲辰闈郡被黜淳熙丁未中丙科三歲學于正獻公

復師以研繫我族父昭

穆會稽非宗疇譜同源迢迢宴堂是叙

少傅挽正獻詩曰宴堂聯族子

講說後

相臣嫉忠同黨同鉤

韓侂胄擅權正獻以大學士罷入偽學少傅以論蘇



師旦亦廢

正學勃興象山武夷相繼登朝奉常羽儀維我少

傅抱其魁竒曰經武有本日用不疲絕幣罷書感勵孜

孜迺登東觀迺佐宰司歲為閏茂正肅冠廷

嘉定甲戌正肅進士

第一正獻祕監兼祭酒當是時越公為祕丞兼樞密院檢詳越公登第已二十八年

正獻休休少

傅繩繩載史纂謨致事以行少傅作程均羸紀經翼翼

京邑十載救寧憬彼介狄迴戈指淮鐵駟亟喧為厲之

階公在宥密展誠弼諧悉卒宵征拉其妖蠹總戎輔京

秉燾受齊

李全叛以同知樞密院浙西制置使

姦沉于淵公歸在里徵彼

壽俊縣車告止

于時徵公及東陽葛公參政宣公皆不至三公年皆近八十矣

三啓公

府永楚賜履復荒于齊終越以祀冢子廬陵克謹其承

曰惟瑞安儉不近名生我俊兄志學蜚英上試銓曹計

偕薦膺余年尚孩企焉戰兢女紀既蒙訖錄更符匪曰

愚智阨窮同塗火焚高閼戚戚告瘡不敏其芸莫植其

居泯奄長夜盡然永徂念子之稚孔疑孔朗不寧以餬

俾游沈荒我雖異途與汝同情無為夸淫無溺燕朋壹

爾氣神履冰奉盈我宗匪微德芬匪沫來者之榮逝者

之戒沾沾懷新不究其敗鑒彼太素曷其有壞述我祖德送爾言邁匪窮咏歌申以用誠

張孝子

汴張元綱之父為南陽屯丞母卒焉葬於府之南灘元綱痛不得復于里銜悲茹辛縮板負土崇為堂形尺以二十周廣之度十有二尋屹然而嵬望然而臺甃以陶甃堅靚慎密構亭于中以庥其神屏傭役躬畚築謂鞠育之義由已而始盡於是暮年迺成河南

田君秀撫事徵實謂桷俾有述詩曰

粵若古先巢穴奠居齋齋其仁詵詵其愚返真玄丘精  
麋魄枯如蛻斯登如轂斯哺後王後民百幻具師顧瞻  
本初寧不爾思蘩裡蓬顙惕焉表微歲月既遷孰封以  
機窮惱恣華輟泣而夸力殫於民禮廢於家千夫丁丁  
逞巧莫諱風淫雨饗卒為泥沙嗟嗟小子內省是嗣維  
張孝子無貨財是恃無奔走是俾宰如慎如惟手拮据  
夕號其陰朝升其墟我心匪墜我力匪痛焦肺渴肝翳

翳慈顏曰天有命茲土是虔宛彼飛鳥亦集于原隱而萃之有阜孔堅魂寐于所不畏不侮汴水湯湯其流匪沮孤征云邁入此室處申以顯之以詔爾永慕

徐母表閭

大名徐夫人以節名于夫宗晚居錢塘有詔表閭江南於是其子大夫公執憲東浙食豐享榮侈且至矣廣彤管之懿傳青簡之信春容整嚴熱筆林立四明素栢廣為頌詩以備道人之採詩曰

婦道貴柔厥義彌剛柔以內施剛以外防熒熒秀芝空  
林自持永辭春榮三秀何虧維魏徐母玉雪其躬端操  
靜閑凜焉高風念昔惇惇黃鵠孔悲婉彼孤雛不能奮  
飛春條其桑秋勤其穡聿懷深憂世德靡忒漢嫠張芝  
歛却駙馬黃髮稜稜高秀里社蜀女周度斷髮表心矢  
言堅石厲躬鍛金沛有桓女少名其宗援刀割耳之死  
莫從繫此三粲代表其閭垂裕莫聞靖言長吁桓桓大  
夫退食自公擊鮮具甘是宴是崇勗哉大夫教忠于朝

養和服寬慈令孔昭四海晏清士節莫著歸為閭閻陰  
教是助雙闕峩峩天澤所表維夫人節維大夫孝我庸  
孔勤亦莫我敢效歌此擇辭永言申之過者必容四方  
其訓之

致樂堂

為鄧陽周南翁作

有嚴周門寢宇孔齊溫其碩容西南有閨爰琢璧楹爾  
養爾承慎而絜清以燠以明維大夫母柔恭俾壽嗟余  
季來教言孔懋木之彬彬視其同根有渰者雲孰隣而

升伯也于房仲氏中唐先子之淑翕焉以光我堂如跂  
我懷靡止載車以行不竦不倚周京斯弁旨甘有衍匪  
旨甘則怡樂且靡遠彼堂在阿樹松莪莪黃髮皤皤童  
舞婆娑于以樂康于焉作歌

臺氏舞衣堂

彼崇者堂白雲中央蒼蒼維松舒泉湯湯有矜孔碩有  
繆孔芳差池東西率祖以行令德允脩不震不侮孫曰  
吾祖祖曰吾父服其斑斕式歌且舞飲以大瓢爰擊其



缶維咏維猶垂手以招有髧者髦彼雖天天永祈黃耇  
福祿宣昭左右承翼見其二毛厥居安矣亦既完矣樂  
時永清俾庶俾蕃肆其幼儀雖雖桓桓宜爾雜服終焉  
考槃

古詩五言

舟中雜詠十首

好花避車塵飛入黃河洗河流政茫茫一去不得底納  
汙有至道胡為愛清泚念茲物理深玄籥從此啓

飛鴈翔南雲避說端有得舊年春風歸雪花大如席陰  
陽眇難窺造物司其職慎勿事炎涼來往任行役

道逢射生船有鶴馴且臞青絲閉其目病翼寒蕭疎臯  
禽九天來此豈真吾徒獨言羽毛侶盤桓為長吁

家奴拾枯草走兔來相親生來不識兔却立驚其神行  
人笑彼拙歸來始嘖呻乃知特幸脫未信吾奴仁

白葦生寒沙殘花搖敝帚燕都百萬家借爾作薪樵物  
微生最下功用迺堪取大勝桃李花矜矜鬪妍醜

清夜視北斗正色搖我前迺知中州殊饒饒浪談天召  
公化南國美教來自燕乾坤儻一致地氣何由偏  
紙鳶帖晴空飛輪走盤線東風恣昂藏得意隨手轉攀  
雲政相喜墮地忽復怨兒童豈知此得失終戀戀  
惡馬少駕車駑馬多駕船駕船勿戚戚駕車何翩翩渠  
命有通塞誰能別媿妍君看鹽車下淚隕如奔泉

春菰種北土三年變蔓菁一為居養移自覺顏無情南  
山植松苗深根定生苓千年化堅魄豈比春菰榮

鸛鷗漾晴空意態極楚楚翻風蒼雪迴轉日爛銀舞盤  
旋傲飛鴻清遠敵凡羽須臾下魚陂愧我覺疾去

車行二十八韻

乘車古云貴此意昔空羨河流露枯沙桑本接晴甸大  
車蓬蓬前小車鞦韆殿高緣縮先登却立駛所見隆如  
龜戴殼縛如蠶裹繭効駕何昂昂帖耳復戀戀高岡互  
回伏遠樹時隱見禪趺恣掀簸尸寢作瞑眩初疑肝膽  
傾漸覺手足顫兩耳傳鳴雷雙眸瞥飛電縈迴蟻旋磨

局促蟲負版氣奔驚七還心嘔復三咽地軸從此翻日  
輪肯同轉軒輞怒交撞戚速急欲戰馬悲望雲嘶牛走  
見月喘惡箠恣調伏詈語極鄙賤中宵不知勞亭午輒  
告倦揩摩髀消肉舍弃足成趺蘭慙朝飧薄重勝春醞  
酒土霧散游絲沙塵起飛麴咫尺方欲離頃刻已莫辨  
素衣緇漸化玄髮白新變人言道途苦我意舟楫便雍  
容漸追昔麗緝時想緬輶輪貴尊賢下足表置傳曳柴  
清時羞高蓋羣牧選况茲軌轍同及此寰宇徧詩成記

勞勩旅次時慰言

餞王叅議以風帆目力短江空歲年晚為韻

澄觀學求道八景雲青紅上畏羲娥流鞭霆跨追風相  
知不在貌相見誰為容持此金石心坐閱寒暑中

昂昂萬斛舟浩蕩揚雲縵好風助其端瞬息千里帆層  
波激飛雪正色令愈嚴坳堂覆杯水止足拘庸凡

昔年九方臯相馬不以目想其遺玄黃神氣洞馬腹東  
方有一士被髮羹不肉居然使之來不復困邊幅

浮榮一羽輕至道萬鈞力達人固靈根清靜執寧極淒涼江海念別至勿戚戚空餘好賢心一矢貫千的

魯聖勤經綸坐席常不暖事來非其意稅冕或恨晚每懷千歲憂百歲常苦短叩牛有真理短褐歌石爛

機心起風雨平陸能成江苟非養其恬事至誰能降此心繳明月爽氣通八窻長空掃林莽寒飈助春撞

銅羹有至味易牙敢加豐醢鹽強調適衆口終難同澹泊本真性清淳豈纖容一朝饗帝所祥雲藹晴空

文章工世媚此道非真詣有如東家施捧心學大麗公  
文雲雷尊落筆即千歲斐几生晴漪三沐古錦藉

平居挽士意寶鏡懸秋天清影閱今古寒光萃蚩妍淒  
涼塵土姿朗鑒勞評銓相親耿無語相期欲忘年

雛鳳棲桐枝清音起冲遠英英異羣羽秀色日以婉詩  
書有真託我輩同一莞深根在永閱衝霄未云晚

次韻虞伯生夜坐

炎晶爍草露木末望西顥靜躁誰為尸翕忽紛寸抱志



士法天運炳燭不在老羣經固其郛積神以為寶陋徒  
多言生希名太玄草山林詎心違歲月付幽討擾擾徒  
為名努力在此道

地氣環中州橐籥均宇內中宵炎溽頻露坐猶憤憤遠  
窮太古雪欲徃終有徠馳神極寥廓我筆不可載栖形  
竹素園萬化等歷塊相期江湖深慎勿寒暑礙秋風起  
天末紉蘭結幽佩

次韻伯生

弱冠事墳典里曲譏涼涼螢爝不勝火矧敢扶朝光驅  
車出門交一粲逢清揚壘尊實玄酒至饗不在觴慎勿  
飲世人徒令攪空腸紛綸五經學遠祖遺仲翔知賢恨  
已晚相見復慨慷

至道縣日月無言炳陽秋辟世端有方低昂少淹留汲  
古理脩綆寒泉漾清流永懷魯兩生議禮終秉周我言  
失造次燥吻譚郊丘此悔行已止歸田賦宜休空餘六  
籍意歲晚期冥搜

再次韻伯生兼簡仲章二首

重柳積清潤曉日疑蒼涼萬化同一氣斯須變朱光夙  
志尚幽隱清夢時悠揚愧非酒中聖客至同覆觴委心  
理縑簡念至迴中腸時節忽已迅秋雲鴈南翔相期慎  
素業載歌慨以慷

俗士同酷暑可人似清秋邂逅得二子傾心為渠留相  
望塵隕霧相親汗交流積雨暗京國苔痕生道周神交  
徑心醉何必登糟丘著書君已定彈冠我當休唯餘舊

詩律支頤費雕搜

德生詩律清遠少與之比嗟歎不足復次韻二

首

皎皎明月裾美製異厖涼薄游起嘉譽妙選歸明光濡  
毫百王度麗思方抽揚澡身佩璜琚慎德銘豆觴蕭艾  
不並處三嗅懷剛腸永愧斥鷃姿側身廁鵬翔終然願  
胥附竭誠以慨慷

玄鶴警清露遠思凌高秋長松有佳蔭嚶然為之留譬

彼明月光那能染黃流洋洋日以往天風迴不周畏此  
颯爽涼行當返浮丘同憂有奇士詩來賦歸休遺經倘  
可理墜緒期旁搜

鞭馬圖

為狄誠父作

生駒萬里意所向知無前圉人忌其德未試先加鞭要  
令俛首馴使我常相憐伯樂死已久此道不復傳駕車  
困泥塗伏櫪老歲年所用非所養誰能別蚩妍畫師逐  
時美謂爾誠當然披圖重嘆嗟我意何由宣

張希孟嘉慶圖

其祖伯祖皆年過九十

舜泉清且甘歷山秀而朗淳風邈泠泠舊俗遺穰穰怡  
愉二老歡敦厖百歲長銀光浮勝頰素髮垂過項階庭  
尊孝謹閭里化廉讓春風連理枝晴日九節杖犢車共  
東西漁舫同下上蠶麻課餘閒豚韭隨薄養薇山悲首  
陽菊潭陋胡廣愧彼非禮羅居然嬰世網孫枝孕天葩  
祖風躡遺響含飴記疇昔興門慰期獎冥鴻天機韜喬  
松白雲徃緬焉清風佳庶作高山仰

游長春宮分韻得萊字

珠宮敞殊界，積構中天臺。  
神清歷倒景，青紅隱蓬萊。  
羣山助其雄，衮衮從西來。  
八荒昔禹甸，為此增崔嵬。  
舊邑環蟻垤，清泉覆流盃。  
雲低落日淨，莽蒼同飛埃。  
緬懷古僊伯，采芝雪氍毹。  
長春豈酒國，殺氣為之迴。  
天風起高寒，玉珮聲徘徊。  
空餘水中輪，歷錄環春雷。  
人去已久松聲有餘哀。

次韻徐志友雜詠十首

師川樞密  
五世孫

喬木空雪霜孤枿存十一遺聞備家乘零落寧有述文  
勝理固然相道返初質志士心未降黽勉終昔日

刻志非不工畏脩迺其怠勞生悟其機靜默希遠害棄  
觚強浮湛念至時永慨佳人在空谷不復夸絕代

嘉賓秩初筵至饗不在酒傷哉囚飲徒醉目恣可不獨  
絃不成音短袂莫回肘恃此百尺臺誰復憂蟻朽

至道存遺音我琴不堪撫愛此素心人更僕請遽數文  
章有正律短計工百沮寡言徒自高憂熏汗如雨



盈盈道間花秀色爭餘春舉俗競愛之孤芳愧陳人譬  
彼鏡中月照影終有塵八荒已同雲客行復踳踳  
玩易悲三陳微服志已迫胡為守其恬正色養神宅迺  
知無邪詩經緯貫三百載籍天所扶終古脫五厄

古來操縵功時至能安絃近復顛倒之擊石求飛煙  
冠儼尸坐委蛇養脩年廢此汗簡勞謂可一唯傳

談經各戶牖正道誰當承朝菌不知朔夏蟲復疑冰  
高堂屹崇構相彼甌與瓠師門有遺訓此語非吾能

豫章古詩法萬折江海偉層波激奇觀妙用安可幾安  
語非不能萎蕤乃氣累東湖有真傳廊廟振朱屣

天風眇東南碧雲澹凝戀嗜芰同苦心相得不在見黃  
塵各道里玉雪起清遠它年有飛鴻為我繫書箭

再次韻答仲章仲寶十首

東南有奇觀萬戶粲如一覽古幽思深擬筆追七述芳  
澤同聚塵清淨葆昭質所憂不可言凝睇悲落日

良苗沒深蕪穡人志其怠無端揚飛塵螟蚋賈深害力

耕未逢年歲晚空永慨深悲采芝士却穀全季代

春雲倚春山搖蕩如春酒相親在顏色念子心獨不薄  
飯時充腸短袖不掩肘高樓政清歌盈盈自芳朽

驅車學遠游古劍終夜撫長安袂成雲我去何足數相  
知有奇士不畏道里沮寒風振枯林落葉起清雨

西山鬱佳氣萬古留青春夏露巖壑姿邀彼車上人之  
人有行役莫浣車中塵空餘白玉泉隨車走跋跋

長松養華滋陋彼霜霰迫虬枝結層陰下庇十畝宅擾

擾區中人生歲寧滿百慎勿以智夸相逢復相厄  
新月無定姿低昂起初弦南飛有孤鴈驚沙度踈煙一  
為居養移來徃忘歲年感物非不多音書為誰傳

束髮交老蒼道大誰能承澄心養真源寒泉護清冰傷  
哉注巧勞欲作千金饒豈無須臾好陶人愧非能  
淵明仕浮湛投劾志始偉愛此松菊佳餘年悵無幾八  
表雲鶴還不作身後累陶然且就飲軒冕真敝屣

我家古城南喬木起清戀空江納雲影清夢時一見相

逢故人深各念居止遠他年東南來贈君以竹箭

三次韻酬周儀之虞伯生十首

英英雲中君含思歌大一迴鸞舞天葩流粲杳莫述報  
之不成章玉雪耿素質臨風發長謠庸以永今日

昔學空巖居之人怒其怠哀猿雜山狖驚嘯欲我害天  
隱神所藏別之空悵慨桃源閔深竇亦復知晉代

道逢學仙人御氣不飲酒我笑初無言彼已嗔我不哀  
哉守其愚繫石猶在肘冥化隨悲風淪淪骨成朽

遠客思故園孤松為誰撫露白天宇清鴻歸暮雲數誓  
將畢幽計勿為此游沮念子知我深神交泣天雨

楚歌惜白日燕歌蕩青春哀樂自逐時流幻區中人我  
生功名念素領無纖塵飛鳶竟跼跼啄雀徒踈踈

羲娥挾雙輪冉冉老見迫丹臺漱靈霞瓊蕊生尺宅控  
搏無須臾詭幻已千百慎此陰陽機逃虛脫真厄

奇樹生南薰清坐彈五絃淳風邈永古白雲赴蒼煙世  
故日以媮俛仰隨歲年折腰倘為酒貓足青簡傳

破甌居井眉勺水不得承寒樛轉餘瀝天風助為冰舊  
質儼有在誰言真破甌愧彼埏埴功成壞非汝能

龔生天天年苦節亦良偉輪囷閱書傳此事寧有幾口

腹非過謀形骸迺真累所以商山翁終復著漢屣

少年恣青春歡至無復戀一為關河行常恐不得見新  
鴈雲中來飛飛落南遠歸心耿無寐寒更促浮箭

題汴梁推官周子明三獄詩卷

三章結漢網清淨歌元元後世益以密姦愆日云繁治

法如理絲衆禁政多端一絲不得直萬緒何由完虛心  
納衆口至理藏片言永念死者哀更推生者寃汴州古  
循吏三獄成平反天道詎幽遠于公有高門

題弋陽巖山精舍圖

紅塵落青山飛瀑遽洗之孕此巖中居寒膏漾淪漪白  
雲偉衣冠修松古鬚眉書聲出虛牝杳杳空中麓桃源  
有神界天光固幽機一為漁父游妙筆工研窺至今武  
陵郡山水傳清暉



次韻仲章蔡村阻風

足弱辭北騎身輕落南航懷別意況濛濛問俗心悠揚豚  
非供歲歉蠶麥扶時康幽事不滿眼薄念時迴腸天風  
進蕭蕭海日懸涼涼喧壓土囊裂悵羨雲帆翔衆樹失  
高下老鶴追微茫而我獨偈仄與子同阻長靜退實守  
道躁趨迺捐常愛此金石貞詎為道里忙相從果無悔  
後會誰當忘

次韻陳畬齋七首

明月明年何處看為韻

秋月如靜士炳然河漢明白雲護其清迸作飛空瓊此  
月不受彩却行印中庭白雲忽不見我思徒英英

靈魄表空輪隨陽產金玦須臾白璧成盈盈懼顛越陰  
陽環無端變化終未歇獨恨今時人相忘舊時月

人言月有桂天風墮微馨開軒睇扶疎西與銀河傾桂  
本空中塵那能助虧盈朗鑒自終古匪待今夕明

舊年客清秋望月如望年長身兀孤影哀鴻起清圓落  
葉墮我後北斗戴我前勞生果有役念至心懸懸

海觀濯銀雪金精融太和照我身上衣光耀何其多感  
此萬里意逝將飲亡何亡何豈真樂臨風託長歌  
暝樹迴朝光驚鳥不知處羣動俱念安客行有程度熠  
耀驚宵征熒熒化餘腐豈不畏跋履眠食在謹護  
殘醒強清坐朔風生樹端客袂何皎皎客扇何團團念  
此會合意永與明月看他年返舊壑願比青松完

蔣商卿叙其先人客金陵與先子事契末章復  
以見屬次韻

堂堂金陵州草草石臺路羽書急星馳鋒車却金錯飛  
雲古戍基積雪寒沙步我舟欲輕行我馬何踟顧乃翁  
入門初此夕傾蓋故寒暄謝浮語信宿陳薄具茲年心  
尚狹維時歲云暮艱虞脫九死邂逅欣再遇貞姿固青  
松雅曲廢朱鷺二老古先民百歲等童孺微疴隔音容  
鉅痛割心腑孤根擢遺肄淳嘏悲弱羽緬懷青氎舊力  
守韋編素伊優笑侏儒咕囁陋章句珥貂匪七葉插架  
同四庫談空齊諧虛守樸燕說固芳林極蒼蔚溟海窮

混濩迺知山中雲政異巖下趣心聲要成律易象那可  
註羣賢凜無幾餘子孰自數愛君思如泉愛君美如瓠  
願為汪汪深勿作翕翕附巨構千礎承珍裘百狐聚混  
世同鋪糟勞生已嘗醋整冠儼初服拂衣謝紛務溝斷  
寧繪犧戶樞詎為螽情深盡傾倒醉劇多謬誤忘機絕  
矜絜落筆化塵腐水深嘉魚潛雲重樛木怒翩翩林間  
鶴栖栖井中鮒飄零記疇昔慷慨合和煦辱贈難與酬  
臨風復成賦

集廉園

芳菲廉家園換我塵中春古樹不受采白雲為之賓中  
列萬寶枝夭娜瑤池神背立飲清露耿耿猩紅新幽蜂  
集佳吹炯鷺搖精銀層臺團松蓋其下疑有人奕罷忽  
仙去飛花點枰茵高藤水蒼佩再摘誰為紉濯纓及吾  
足照暎鬚眉真暝色起孤鳥寒光蕩青蘋信美非故居  
整馬來城闌

次韻仲章杜門

今日慵出門戶坐觀我生忽有故園思寓之不成聲舍  
北兩朱櫻翠羽垂流纓含南青桐樹亭亭如蓋傾念此  
永契濶為爾增拂嬰歸雲跂西山臨風意縱橫

暮歸

馬鳴千柳昏犬吠一星出晴全暗歸道客子塵滿骨入  
門視疎燈隱若眼中物展書弗能誦浩氣彌碑兀古來  
惜陰士志有不黔突愧我非等倫顧影竦毛髮寒風肅  
羣動勁氣激清樾飢鳥念其安驚噪落林月迺知造化

理壤壤殊未歇

贈黃教授歸閩中

壺山東銀筆秀色倚車蓋其人清且明十室九冠帶林  
鄭陳方劉祥雲布鄉黨緬惟乾淳初朝野實交泰執耳  
為之盟多士森升會澄懷味蘭芷正色炳著蔡彌綸古  
編簡粲錯列文貝百川已東流末派擁溝澮飛霜隕喬  
木變脫等蟬蛻艱難老文學世德芬未沫布袍黑嶙峋  
慘澹萬里外希音繹風雅一鼓瘖萬籟宛彼孤飛鴻鳴



聲何噦噦飢來念其安飲啄欣有賴涼風振修衢肅肅  
返征旆懷賢不成章因之結長嘅

送許世茂歸武昌二首

其祖慶元大魁  
先公嘗與同朝

岷江下奔流日夜東南趨艱虞六十載蜀客無完居纖  
脩挂晴練五老為之廬招彼素心人蒼翠垂流珠峨峨  
銀臺公懷寶耿未攄青桐擢孫枝下此佳鳳雛絢爛五  
采翼披霞表亨衢清音冥鴻遠逸興蒼鷹俱食竹戀苦  
志餐風養真腴誓將八極周覽德為貞符歲月諒有盡

雲端復躊躇躊躇固吾事荏苒悲征途

蒼莽鸚鵡洲日落楓葉赤昂昂處士恨蔓草化為碧之  
士輕且儼之人何急窄至今千載下投筆弄鋒鏑銀城  
太古雪轉首一消釋雍容詩書郎浩氣裂金石裴回登  
臨意寒波靜如席相逢各萬里末契論夙昔咿嚶語未  
盡征鴈起暝色淒涼衣冠聚山海窮畢弋翳翳桑榆光  
人物眇可識停驂望前坡去馬記初驛

題金華洞圖二首

巍巍靈居秀遙岑擁頽霞聞昔受道時三洞為其家金  
精裂飛魄躡武凌青華遺彼一寸松樛柯養真芽瞬息  
服光景神丹起槎牙下有千歲脂百靈靜無譁此豈甚  
祕之服食世所夸真凡路永隔輕生竟如麻

其二

五嶽扶神州

葛稚川地記言金華能避泮水之患

泮水胡為魚茲山鎮無

極不竦復不渝靜閱浩劫理兩曜跳玄珠矯首二皇君  
寶冠白雲輿方瞳駐真盼獨垢紛何如霏煙聳空翠滴

露凝流蘇神鈞合虛牝松聲自笙竽窈兮忽不見諒此  
寧非居

送張上卿燎黃上塚

素質超崑崙瓊胎孕崆峒指木為我母問玄為我翁承  
暉企春榮百歲如捕風朝暉何朗耀莫景何葱蘢返真  
紫虛臺合歡朱陵宮迴鸞從舞鳳景命來圓穹妙感非  
世窺揚靈憺無蹤湛兮合冥會道一為之宗沉沉白雲  
關雙鶴鳴青松念此不得見悵焉遲相從

壽何平章二首

方壺屹祥觀，髣髴綠髮仙。  
執簡朝帝居，高演清淨言。  
雲為八表雨，水作四瀆泉。  
炳文一以施，握之不盈拳。  
頰首陳至詞，囊括希其全。  
成虧匪至理，願言葆真玄。

琅琅黃石書，功成迺言去。  
豈不思濟時，默焉念其素。  
山中赤松柯，云是童所樹。  
長養媚以深，屈曲美無度。  
神光滿澗谷，希夷澹無慮。  
願持一觴言，眉壽在謹護。

次韻雜詩五首

有客一馬歸屋角羣星明念此惜日苦義輪何西傾  
粲風中花弱豔夸芳榮而我獨枯槁欲學身後名

少年觀滄海天濤碧因依下有珊瑚株紅光射雲暉玩  
之不忍舍歟吸雙龍飛遠為塵中游坐覺顏色違哀哉  
西山士飢食周原薇

昔狂愛奇士接席多大言中道邂逅之捐生誓俱存傾  
家謝其意酒至絕不論此士今已矣長年常閉門

幽居集奇觀積雪明寢扉湛湛新陽舒寒光騁熹微吟

嘵南歸鴈長鳴示其機出處諒有素觴來為之揮

朝游東門曲壞道荆棘存累累者誰冢舉觴酹其魂死  
無落魄名生有咄喋言所以荷篠翁臨流漱潺湲遺簪  
隱世德忍垢躬灌園豈忘輕肥念苟得誠少恩米米松  
上花飢來助吾餐

壽程內翰二首

蕩蕩長壽居丹梯峻蒼旻中有龜鶴所老仙為之馴維  
時夏初至園林綠蓊蓊萬神戎冠環參差揚七均行雲

鎮清樾靈波激層津振衣游帝青下土何其塵運與千  
歲期正色光景新無為理清淨世儒汨其真君子法簡  
易坐致義皇淳

車蓋交道周嘉醕盎在房有客東南來高歌奉清觴一  
歌白日還再歌青春揚師曠世固有八音盪翱翔迴鳳  
下奇雲猗桐非故岡覽之不食實三嗅遺孤芳皎皎金  
石姿令德豫且康窮河覩崑山出日賓扶桑介此黃髮  
期因之結成章



別仲章

飄飄貢公綦遠乃至關河關河冰為天積雪流銀沙前有林間鳥後有馬上笳鳥啼思我親笳鳴思我家川流去不息羣山赴嵯峨余行已東南朝曛散微霞念茲日不見持觴酌餘嗟

別吳養浩十首

以願為江海深勿作盆盎淺為韻

弧矢懸高門卓犖四海願登車遠且遲永念道里遠雞鳴當宵行執轡上長坂西北何其高飛雲列奇觀

游神竹素園古聖儼若思至道篤靜極執簡欲受之上  
有奇耦文摩盪光離離持以禦魑魅魑魅不敢為

維東匯為湖浩淼通三江懷哉紫芝叟月明漱飛淙小  
言諒以清大言淳且厖去去日未遠奔流鼓春撞

昔聞方壺居誓欲往滄海操舟迅前邁雲雨白皚皚層  
瀾眇空洞肉翅不可待朝陽漱靈霞一食毛髮改

古有無媒女閉門泣春深手擲雲錦梭流光耀晴陰千  
葩翠交結宛轉不可尋浮雲為之佇幽凰為之吟

昌歎懷古辛在德不在物屈曲寒澗底詎以險自屈有  
客同嗜之至享寧勿勿芳年匪淹留薄采消永鬱

雲和高岡桐龍腹裂冰電攫之淳且深謾謾震寥廓彈  
者不復語往者誰可作玄雲浮陰來開戶失雙鶴

緱山仙人居上有玉女盆解髮三沐之清冰盪寒紋神  
膏釋翠縷跪坐晞朝暾蟬蛻有變化蟋蟀安足論

客來南榮下欣言酌醞盎觴舉壺已空盤辟復三讓享  
之不成章何以爲客貺客言君當休商聲助予悵

草茂木萋萋水勁石翦翦相思關梁深相對顏色淺停  
雲眇為愁殺蒸可崇饌食之寧永飢臨分復三咽

度淮寄養浩

竹清寒房靜殘月在西壁悄悄燈影微尸坐棄枕席井  
華飲蟾蜍玄雲成五色明知非世謀精詣在六籍我行  
長淮浪凍樹挾春碧夢子白紵寬雙眸炯空激書來婁  
在手此意何的的數面不成歡遠別迺復惻歸鴈臨風  
翔先之寄深臆

懷伯生

春雨消路塵春風散林纈蕩蕩長安門客子千萬轍城  
陰有一士淡食羹不啜采彼松上露煮石化晴雪沈冥  
護真性觴至那復說向來舌本談今作耳根熱維南有  
樛枝巖溜滋百結在德良自防居屯詎為折念此長夜  
深寒光吐殘月

酬蕭靜安提舉二首

溜泉散餘塵稍稍軒檻清孤凰起天末縹緲參差鳴佳

音寂萬籟異采含蜚英衆葉豈不光終然哆春榮翩翩  
者何雛和之欲成聲迺知雲間意非復區中情

有客何方來贈以雙南金維時夏初溽寒光激玄陰至  
靜閱真賞獨晤諧希音伊江渺風濤伊林復崎嶇出處  
各未得冥思結長吟於粲不能報泠泠手中琴

題劉充之載月圖

磊落太古月搖蕩湘君波寒晶爍膏露倒景流銀渦湛  
湛洲渚淨天風泛飛槎晃蕩神界中四客獻且歌憑虛

歷空洞金粟搖靈柯流光閔星斗怪影窺蛟鼉服食詎  
在酒三咽顏為酖俯仰會合初逝者已山阿昂昂菊間  
叟秉芳獨婆娑微茫信可傳披圖重吟哦

壽賈叅議二首

粲粲雪中松八表迴鸞翔下有采著叟澄觀振高岡握  
著玩鴻濛竹簡儼在旁湛焉貫累珠炳變猶龍章笑指  
青松言貞固以自防網緼迺玄化清雲表奇光

嘉平維吉辰初陽起天心彩鳳歛參差落落空洞音徘徊

徇碧雲宇賓從羅清林神鼎朝已調芳醴時當斟損益  
在我手啓齒歌瓊吟煌煌秉令德盼彼西山岑

次韻揭教授官闔中

鬱鬱太古樹叢生散珠玕明時炳陽德寥落歟歲寒天  
風西北來凍海翻層瀾芳朽各有性盛衰詎無端貿貿  
冰上屢黯黯塵中冠宿志不得醅奮飛戢其翰伊南蹇  
一士羈鴻河之干手持大雅篇八音佐王官牆陰卧朝  
日薄飯不滿槃邂逅喜我同金石生肺肝出處非故意



低徊耿相看  
閩山渺雲濤  
東望通三韓  
居夷聖有在  
取琴為君彈

寄題撫州先天觀

浩浩太古石  
雕鏤矜嵯峨  
瓊林化飛騫  
寶構窮鬱羅  
矯首視三光  
丹青相盪摩  
上鄰列僊館  
西移瑤池柯  
玉蛟亦受令  
鞭撻迴盤渦  
巍巍雙華表  
飛鳥不敢過  
玄鶴時一來  
潛鱗淨無波  
心跡會虛湛  
神光隱鳴鼉  
緬彼巢居子  
凝睇佩女蘿  
天風入紫京  
百靈莫誰何  
朗言渾沌後

龍馬方負河視之杳不見嘉名表山阿冥思有至理熟  
視時摩娑

送牟景陽教授天台

峨峨陵陽翁麟筆凝秋霜採芝空巖曲白雲以為糧微  
言酌太古妙思歌瓊章餘人涉其藩自謂真班揚此道  
端未泯我心何由降

五良秀高門用處各有在伯如幽蘭深仲若春雲藹叔  
也端可人芳林起新蕾垂天得扶搖一決度江海相逢

慰傾倒曾次澆磊砢

天台古儒林秀士英且明君行振遺緒家學揚清聲文  
詞尚理性此弊無由更衆咻方爾羣獨拍何當鳴為問

舒與胡寒庭草青青

閨風梅  
澗也

功名不願多我輩端可免南州已寥落屈指閱諸彥汰  
如糠在前得若車度坂愛君不可留尊鱸慰佳願黃塵  
我何事寒燈起清歎

雲隱齋

油油山之椒翁忽變平陸下上何其勞一息返神谷凝  
光養澄觀清潤積新沐知白吾未能寒聲起林木

劉朗齋侍郎孫希孟能琴欲訪子昂觀松雪琴

以詩寄之

雨雪戒修塗苒苒歲云暮維舟望鄉國煙樹渺無度永  
懷松雪翁買田成隱趣齋中六尺琴清徹仙掌露虛聲  
合空洞天籟生磬濩勿為離鸞音眉壽以保魯

時有悼  
亡之感

送胡安常河南省員外郎

陽春惠澤廣蟬動回昭蘇皎皎尚書郎佐理勤居諸澄  
懷罄輸納疾首宣訏謨黃流交道周髣髴桑柘驅馬  
憩枯礫詢彼壟上夫歌臺久寂歷商聲助清歛昔有屠  
羊子慷慨成須臾感激車上禮朔風為之吁俠氣散鋒  
鏑侈習翳榛蕪舉觴酹其蹤興廢今何如三河水門記  
白粲來東吳願言表里道坐使民驩虞

次韻張秋泉墨蘭

虛窓秋思集晨興憺無餘墨池漾清泉天葩散紛敷愛

此巖中君贈以碧玉腴微雲解蒼佩縹緲疑空無遠謝  
丹白昏詎畏霜霰濡守黑志有在談玄道非殊愧彼夷  
與齊絜腹不受汚湘纍慨永古世人陋其迂臨風嗅餘  
清是豈真緇徒迺知萬化寂妙巧窺分銖幽蜂綴疎蘂  
點點游晴虛閉門謹視之黃塵政紛如

清容居士集卷三